

perhò esso re di numero di velle, ma di valentissimi homeni etc.

Intrò il colegio di le biave, perchè l' bisognava, el bonus manchava etc.

Da poi disnar fo conseio di X con zonta di colegio etc.

A di 28 zener. In colegio, prima tuta la terra era piena, si havia abuto letere da mar, et recuperato Coron etc.

Dil capetanio zeneral da mar, date in galia, im porto di l' arsenal, a la Zephalonia, a di ultimo zener. Replicha l' acquisto di quella terra e castello; lauda Alvise Muschatello, suo armirao, et il concordio è stato col capetanio yspano e tutti, e nostri hanno soferto assai Item, à electo sier Alvixe Salamon, sopracomito, in provedador de li per anni do, con provision de ducati 40 al mexe, neti, e altre condition, come à il provedador dil Zante; et questa è mior ixola; el qual, *libenti animo*, acceptò tal cargo. Item, in la rocha elexe per castelan, per anni do, *ut supra*, sier Zuam Venier, quondam sier Francesco, era nobele su la galia di sier Andrea Bondimier, con ducati X al mexe, et uno fameio; e li meterà bon numero di provisionati. Item, à electo capetanio de l' ixola, ad andar per tutta e far la description di le case e anime e animali, sier Hironimo Liom, di sier Piero, con li modi à il capetanio di l' ixola di Corphù, et per anni do. Item, à posto scontro al libro di le intrade, Michiel Capsa, scrivàn di sier Daniel Pasqualigo, e za fo soramasser di sier Andrea Loredan, *olim* capetanio di le nave. Item, à posto a custodia di la rocha alcuni provisionati, con ducati do al mexe, e li à dà paga di do mexi: et ne à trovà numero 100; li altri non hanno voluto restar; et à fato do capi, Antonio Valier, suo compagno di stendardo, e Zorzi Volzimente, venitian, ch'era di le lanze spezade di Gorlin, et uno stia in rocha, l'altro in la terra; *etiam* vi lasserà marangoni, mureri, 521* taiapiera, favri e alcuni bombardieri. Item, scrive si provedi in mandarli fanti, artilarie et monition, e formento, meio e biscoto. Item, à comprà alcune cosse, erano in castello, tolte per spagnoli. Item, el Danese non à voluto restar li in la Zephalonia, et Giacomo Coltrin non è ancora zonto; e oltra li farà veder quel castello, lo manderà al Zonchio, e poi a Napoli. Item, al Zonchio à mandà la nave, patron Piero da Liesna, con stera 500 formento, stera 100 orzo, 20 mièra di biscoto, legnami, e li à ordinà lassì li le artilarie soe, e vadi a disarmar, e lievi dil Zonchio le 9 ancore di le nave grossè si brusò, e le conduchi a Venecia. Item, li manda ducati 200 di tor-

nesi, et ducati 200 lasserà a la Zephalonia, per il fabrichar; et è quelli si dovea mandar al Zante. Item, vol biscoto e vin, e aspetà la caravela, patron Zaneto di Muran, con biscoti; e di Puia, à scritto, et non ha risposta. Item, à rasonà col capetanio yspano di andar a Santa Maurà, et spera im brève finir, per esser l' impresa facile; poi andar versso la Prevesa et Santa Maura, et principierà a mandar *dextro modo* a disarmar le galie e nave; e aricorda si armi, acciò pari mandi a renovar l' armada; e questo per la yspana. Item, è ritornà le do galie di Napoli di Romania, zoè quella di sier Nicolò Marzello, e il sibinzam, qual à preso 4 fuste turchesche, cazade fino im porto di Sithines, et *solum* zercha 30 turchi vivi preseno; le qual fuste haveano preso una fusta di Legena, e quella hanno recuperato; et li rectori licentiono le galie preditte, per mandar li ambadori a la Signoria; et ne dimanda do altre galie; et la comunità à mandà im Puia a comprar formenti e orzi. Item, li diti oratori verano de qui, con le galie verano a disarmar. Item, manda l' inventario di le munition trovade nel castello di la Zephalonia; et quello recevete da chi tolse ne l' acquisto. Item, la copia di le munition trovade nel castello dil Zonchio, et li ordeni di la bataia, li quali sarano qui sotoposti.

1500, a di 24 dezembrio.

Ordeni de la bataia dada al castel de la Zephalonia, de tute le nostre zente, con le qual etiam erano le zente spagnole. E prima:

Da la banda de levante, al bastiom di Cestoni, erano tui li infrascritti, zoè introrono con el redeguardo:

Sier Hironimo Contarini, provedador.

Sier Hironimo Morexini, patron dil barzoto, capo di colonello.

Sier Marin Dolfim.

Sier Polo Valaresso.

Sier Andrea Bondimier.

Sier Marco Antonio Contarini.

Sier Domenego Capello.

Sier Alvise da Canal.

Sier Fantin Memo.

Sier Sabastian Moro, patron di la barza armada.

Thomà Duodo, patron di nave armada.

El soracomito curzolam.

Piero da Liesna, patron di nave armada.